



Al cjalcjave sui pedâi cun dute la fuarce de sô verde età, ma i someave di no cori avonde par rivâ in timp a puartâ il sô aiût a chê frute che e stave murint.

L'aiar frêt di tramontan i scoreave la muse cun gotis di ploie glaçadis.

Un cîl scûr al veve invuluçât il mont ator, cuntune coltre grise di nûi sglonfs di ploie, un lamp di quant in quant al sbregave par un moment il penç di chê coltre, e un lusorut lontan i lassave tal cûr la sperance di rivâ in timp a salvâ chê frute.

Intant, intune cjamarute, tal slusignâ de lûs lizere di un pavêr, une mari, inzenoglade da pît dal jet de sô frute, che no deve plui nissun segn di vite, e preave il Signorut e la Madone, par chel zovin lât a cirî aiût.

Minio, cussi si clamave chel zovin che al jere dut cjàpât ta chê corse cuintri il timp, nol sintive plui nuie, dome chel bati e bati simpri plui svelt dal so cûr, e ogni tant i pareve di sintî une vôs che i diseve: "pedale, pedale, une anime e je in pene, jê e spiete e brame il to aiût."

Tun trat. intal slusorâ di un lamp, al à olmade une cjase, lagrimis cjaldis a corevin jù pe sô muse, tal so cûr al veve dome un pinsîr: grazie Signôr.

Cuant che al tucà te puarte de cjase dal miedi, al jere cence flât, dut travanât, propit sfinît, ma ancje content. Il miedi si presentà su la puarte dut sbarluffit, al jere a pene sveât.

"Siôr dotôr" i disè chel zovin cuntun fîl di vôs, " ae fie di Nuti i covente il so aiût, e je blancje come la cere e i mancje il flât"

Intun lamp, il miedi al jere da pît dal jet di chê frute, e la prime lûs da l'albe lu cjatâ ancjemò

li, su la sô muse si viodeve la strache di chê gnotolade, ma ancje la contentece di vê salvade une vite.

di Plume di ingjustri

#283